

## Isus z Becići

Napisao – Toni Juričić

Rodi se je na dvajsti decembra dveidvanajste, kada je Šajeta va Harleme ime koncert na vecer prvo fine od sveta. Rodi se je poli Milana, ozgora oštariji na Kapelice. Nesi još bi tamo? Ja ja, sada son se spameti da si ti tek cera rivo va Labin. Znoš kede je Kapelica? Kada reš za Pul, tamo na onej krožere prema Raše. Ćemo poč jedon don tamo, pa ćeš videt. Oštarija ti je va sred sela, na somen kunfine met hrvoti i bosonci. Slobodno moru na ulaz va Kapelico stavit tabelo Novi Harlem.

Da se kapimo, niman ja niš protiv njih. Moja nevesta je z Bosni. Otac njej je Hercegovac. Od sejnega je sela koko i mat od Isusa ka je pred šes let prišla sa munjena va oštarijo i vopila kuko će rodit. Zad nju je priša anke neki mladić. Mislili smo da njej je on muž, ma moli je pokle reka Milanu da njej je on samo pretel. Jedini mu ni verva. Kukogot, kad hi je vide onako strenjene, Milan njin je do kljuci od apartmana ozgora oštariji. Do njin je anke škonto ošto ni sezona pa mu ni imelo smisla naploćevat po punej precije. Ovi su šli gore i pokle uro vremena luče va oštarije je pošnelo migati koko da će cela oštarija, ma i celo selo zostat bez kurenta. Kuko su mislili da će ta don bit fine od sveta, ljudi, brižni i pijani, zeli so saki po bocu vina i napili se koko tovari. Onda se Bepi, tako smo ga zvoli magari mu to ni bilo provo ime, kalo dole, obrnu turo rakiji za celo oštarijo i zavopi – rodi se je Isus!

To da su se si napili koko prosci. Rakije, vina i biri. Vrah se spameti kada se je som Boh nekemu rodi ozgora oštarije, to nan je reka Milan kad smo ga pitali da ca se to jušto trefilo poli njega. Samo da ti recen, nemoj nanke nacimat to štorijo kad budeš poli njega perke će te gnjovit do jutra sten. Mene robi deset minut da ti je recen, a njemu će se tri ure.

I iš vruga, za šetimono don so prišli tri krolji, malo škureji nego mi. Rekli su da su rivali od Siriji, da su se por dni tombivali va brode spoda provi i skrcali se nedere va Tolije. Da bi prišli do nas, so morali igrat žmurice da se bolje moro skrit od policjoti na kunfine met Sloveniju i Hrvatsku. Tamo hi je pobra neki naš labinjon. Kada je skuži da hi je tri, da su škuri i da mu nude regoli, zajno njin je reka da je to prvi mirakol od molega Isusa, to ca ga je poslo da pobere tri krolji. I niš, on hi je pobra i dopeljo poli Milana. Bilo je tu vina, rakiji i pršuta.

Nakon ca hi je napi, Milan hi je poslo va kamaro neka molemu parnesejo regoli. Tako ti je Isus dobi jedon mobitel, malo zlota i još neki vrah ca nikad prvo va življenje neson vide. Zostali su tamo jušto dvo dni pa su portili napred. Valja su sada nedere va Njemačke. Sako leto pošaljo kartolino. Bačini z Dresdena.

Don pokle, pop je priša videt molega i ni verva da je to provi Isus. Si su ga poslali vrit i pop je šo vrit nakon por dni. Nošli su ga mrtvega va ormarone s ponku oko vrota. Jedini ni ote reć niš više. Sakokove štorije se vrtiju oko tega ca je dela, ali bolje mucat. To ti je tako, lepi moj. Ćemo još jedon Favorit popit? Ala šu, tek si priša. Ku pensoš bit provi labinjon i delat va naše škole, moraš navadit se o mirakulima našega kraja. Nego, kede son se farmo? Aha. Imaš pravo, ja. Fala ti.

Kukogot, pokle por meseci, Marija se oženila za našega šloveka. Sejni don su molega krstili va Rapce, va one crekvice poli mora. Isus Flacius. Oženila se za Petra. On ti dela va gorenjen Labine ko arhitekt. Ma je Bepi bi munjen sparacun tega. Povero je celo vreme penso da će brusit. Vecer prvo ca su se Petar i Marija oženili, potukli su se va oštarije. Pol oštariji su rovinali.

Lepi moj, tako jodnega šloveka ko ca je Bepi bi ta don svojni neson vide. Pena kada so mu razbili bocu rakije na glove se je kalmo na pol ure. Brižan se je se na banak i onako pijon koko maleta, zakanto je sevdalinko. Baš ga je bilo milo videt ta put. Najhuje od sega, kapin ga. Ja bin anke bi sa munjen da neki drugi brusi Marijo, a ti si je dopeljo tuteka i pomoga njej rodit. Neki je reka da se je torno od kuda so i prišli, tamo nedere va Hercegovine. Isus hercegovac ka se rodi zgora oštariji poli Milana i ka sada živije va Becići, moreš ti to kapit? Od seh mogućeh, Boh je do hercegovke da mu rodi sina. Mi se paro da su hercegovci propijo veći katolici od somega Francija drugega. Čudni su putevi Božji, to je siguro.

Znon ja ca ti misliš, da se mola brusila s pol Hercegovini i da ne zno ki je otac. Forši je to istina, a forši i ni. Nami je rekla kuko je prvi put rivala kapit da je noseća kada je bila va onen svetište tamo va Marije Bistrice ili kuko se to već zove. Vajk zobin ime tega mesta. Ilirska Bistrica? Ni ne. Ma ni nanke bitno. Ono ca je bitno je da Marija do onda ni znala da je noseća. Pravi da se ni brusila cetiri meseca prvo tega i da je ta put cula molega kuko tonca va njejnem trbuhe. Jušto va ten momente sunce je prišlo i to ti je, lepi moj, bilo to. Bojža beseda da će nam poslat svojega sina po drugi put.

Od stroha, mola jedinemu nic ni gonala do šetimono don prvo nego ca je rodila. Da je vidiš kuko je tonka biš kapi kuko se mogla toliko skrivat da je breja. Kada je njen otac finalmente kapi da mu je mola noseća, popizdi je. Fameja ju je hitila vonka ošto so mislili da se zbrusila s pol Hercegovine i brižnica je ušla poli Bepija i molila ga na kolenah da njej pomore z molen. Znala je da je on ima radi i da će zonjo storit se, samo da je more zbrusit.

Bepi njej je reka da je ime fameju tu poli Labina, da mu je zostala kuća od brata njegovoga noneta ka je priša delat va kovo nedere pokle drugega svetskega rata. Samo kad so prišli spreda te kući va bosansken kuse ot Kapelice, mole je puknu vodenjak, a Bepi je skuži da je zobi kljuci doma va Hercegovine. Ni dvo ni tri, za pet minuti su bili va oštarije i molili Milana za apartman perke dok pridu do Pula, moli će već bit vonka trbuha. Da si ti samo cu kuko je Marija jebala mater Bepiju sparacun kljuci. Poverino ne izgleda preveć pametno, ne. Zajno vidiš da ni baš štabel va glove. Da samo znoš kuko smo ga zajebavali sparacun tega da mu Marija neće dat pizdi ošto je on bosanac musliman, a ona hrvatica veća od hrvota. Ki je molin te vide da se Marija, mater bojža, oženi za bosanca? Uf, ma je bi Bepi munjen kad bi ga sparacun tega zajebavali. Saki put bi nekemu zabi pes va nos. Mirsad se zvo, sada son se spameti. Vražji Mirsad, ta munjeni Bepi ka je uša ča od nas don prvo nego ca se Marija oženila za Petra Flaciusa z Becići.

Flaciusi su dosti bogata fameja, moran ti reć. Oni su ti deboto koko neki vlastelini. Pranono njin je bi advokat, jedon od jebenejih tu va Labine. Da vidiš ke kući da imaju. Va Rapce imaju tri apartmani. Se ti je jasno. Beci ko blata. Si deca su mu štuti i so finili neke štabile školi. Se neki strojari, političari, doktori i arhitekti. Sada so si neke vele face tu va grode. Ferruccio, brat od Petra, ti je va gradskem vijeće. Bi se je kandidira za gradonačelnika pred por let. Kako mu je nećok som Isus, penso je kuko će sparacun tega laglje dobit izbori. Ali jebiga stori moj, IDS ima više forci nego sin bojži. Petar se pokle učlani tamo, skupa z Mariju. Sparacun tega se posvadi z Ferruccion na mrtvo ime. Ne gonaju već por let. Vrah ze i politiko, lepi moj.

Njihov otac je više ime radi Petra pa je njemu do da storije stan va kuće, tamo kede je prvo bila garaža. Cu son da so lepo to parićali, magari ni ni cudno perke je Petar fini za arhitekta. Ma da ti istino recen, ni mi jasno zoc si ni stori som svojo kućo, ali velja je misli da je bolje da stori tamo dole stan pa da pokle za por let storije još jeno kućo ku bude s Marijo ime još kukovo dite. Eko, pasano leto njin se rodila hći, a kuko son cu, Marija je valja opet breja. Forši će sada poč storit kućo, a forši ceka da mu otac krepo pa da more zet gorenji stan.

Nikad mi se ni pježo ta Petar, da ti istino recen. Brižna mat njen je umrla kad su bili deca pa hi nikako ni mogla navadit da budo dobri. Ni cudno da su takovi, pogotovo z ocen ka je bi više ča nego doma. Jebeš ti si beci tega sveta. Beci su vrazži, lepi moj. Valja će moli Isus klas malo amora va svojega oca. Već je kambjo storega Flaciusa. Prvo je on bi sa neki poredan, a sada je koko novi šlovek. Duron se nešto smiji i stalno nedere re z molen i njegovo sestru. Marija ima stroha da će ga stori Flacius vicijat, ma on rece da neće, da on zno ka je mera.

Ca se nje tice, ona ti sada dela va hotele na recepcije. Da ti istino recen, ne znon kuko je dobila to delo perke ne zno jedini zajik. Da zno baren taljonski, nebin niš reka. Cu son da po zime anke hodi na fakultet va Pule pa da bi forši mogla za por let bit direktorica va hotele. Pala joj je kašika va med ili kako se to već rece poli vas. Ne pježo mi se ni ona, nanke mrvi.

S druge bondi, moli Isus je stvarno va regule otrok. Vajk pozdravi. Ima šest let, a pametan je za so potrebo. Već ga je nono navadi pisat i čitat. Sako nedeljo rejo va crekvo i budo va prven rede. Zno so mašo napamet. Da sada tuteka pride i da mu doš jedon bombon, so mašo bi ti moga izrecitirat. Perfine je i moti od popa pobra, pa mu, kad pride s nonetom va oštarijo, hitamo bomboni da kanto koko pop. Hajma, znoš ke smeh to bude.

Ova smokvenjak mu je pomoga brat grojze i delat vino. Reka je nono da za por let nanke neće morat brat grojze, da će samo od kalanice zet vodi i da će moli storit vino. Onda se brižan spameti z koliko let je prvi Isus to stori. Dok mu nuk pride va te leta, on će već bit mrt. Ku bude moga to delat, neka ga stone od mrtveh jušto na uro vremena, samo da vidi kuko moli more storit vino od vodi. Barem da mu rakiju more sada storit, baren rakiju. Saki put kada nan to rece, obrne još jenu turu va oštarije i zavopi - drugi put, lepi moji mladići, to će bit rakija od mojega Isusa.

Pasano leto kada je Marija rodila hći prišla je njejna fameja z Hercegovini. Ku njen nucica ima oca to po njimi velja ni prevela sramota. Storili su najvećo fešto va Becići. Cela fameja je bila tamo. Hercegovci i istrijoni su kantali skupa. Isus je kanto o Marije, kanconu ku je cu na radije. Dok je moli kanto, nono Flacius mu je sopa mih. Naceli so najbolji pršut i najbolje vino. Stori od Marije je posliho kuko moli kanto, sa suzo va oke. Regalo mu je krunicu ku je pop blagoslovi va onen meste kede se prva bogorodica pokozala. Međugorje, jo? Ja ja, Međugorje je to. Sada son se spameti da je tamo Marija bila kad se Isus prvi put movi va njej.

Fešta je šla dalje i se je bilo va regule do onega momenta kad je moli Isus reka da njegov mat ima kozu va takujine. Hercegovacki nono mu ni verva i zajebava je nuka da kuko je moguće da koza more rivat va takujin. Ni dvo ni tri, moli Isus je vine člansku iskaznicu IDS-a ot takujina i sa jodan zavopi – iš da moja mat ima kozu va takujine!

Si su zamucali. Zatišje pred oluju, kuko bi se reklo.

E da mi je bilo videt kuko se stori hercegovac zledi kad je vide da mu se hći učlanila va stranko ko i njejni muž. Da je šla va SDP to bi još nekako rivo i kapit, ma IDS je drugi por postoli. Separatističke smeti, kuko bi reka njejni otac. To da so se si potukli pokle tega, to da su pijati i mižoli leteli okole. Brižan Isus, koliko got da je pametan, ni kapi oko cega se je stori sa ta konfužjon i zoc mu mater ploce. Još se moli ni fermo kantat. Valja je ote tako kalmat svoju mat ka ni mogla finit plakat dok se njejni muž i otac mlote na mrtvo ime. E da mi je to bilo videt ta kažin...

Marijina fameja od tega dneva više ni z njo gonala ošto je po njimi ona separatistička kurba ka bi se sada najraje zamotala va istarsko bandjero i kantala *Bandieru rossu*. Njegnega storega je skoro srce ćepalo. Zajno su ga klali va vituro i ušli ča. Petar je vopi zad njimi da će njin robit pašaport kada se budo tornjivali drugi put. Pijon ko maleta, sa svojen sinon je pošne kantat kuko je sanja uliko, Istro k'o republiko.

Ćemo još jeno biro popit, a? Ala šu, ti si novi tuteka. Ca si ono reka, od kud si ti jušto? Kapin ja. Znon ja kede je to. Lepi je to grad. Ala šu, još jedon Favorit i remo doma! Lepi moj, živjeli! Čin-čin!

Da pašaport i istarska republika, ke ideji čo...

Lepi moj, da ti istino pravin, jebeš ti istarsko republiko, jebeš ti se te fantaziji da se zakrcio tunel. Znoš da je Labin pred skoro sto let bi republika? Mesec don je durala, ma to ni toliko bitno. Prvi organizirani otpor fašistima. Odonda hi ne trpimo. Zato lepí moj, zajebi ti istarsku republiku i daj ti mene raji labinsko republiko. Pokle Raši, tamo prvo Barbona treba stavit jedon kunfin, a va Vozilićah drugi. Jebeš i čakavicu. Samo cakavica, lepí moj, samo cakavica i labinska republika. Kova je naša, beci su vřajži. Imamo se ca nan robi, pa i molega Isusa. Kapiš ti mene, a ja tebe ne?